

PREMIO PAPIAMENTO “CADUSHI DI CRISTAL” 1999.

Esaki ta di dos biaha cu “Grupo pa Promove Papiamento” (GP3) ta bay otorga Premio Papiamento cu a keda bautisa oficialmente “Cadushi di Cristal”.

E premio prestigioso aki ta bay pa un persona cu a destaca riba tereno di Papiamento y ta wordo otorga cada dos aña.

Na aña 1997 e premio a bay pa Sra. Digna Lacle-Herrera.

E aña aki e premio lo wordo otorga na Sr. Hubert Booi, kende ta un persona hopi conoci y aprecia den nos comunidad.

Hubert Booi a nace na Bonaire 25 di juli 1919, pues awor e tin e edad bendiciona di 80 aña.

Na aña 1937, pues cu edad di 18 aña, el a bin biba na Aruba.

Hubert Booi ta conoci como poëta, declamador, traductor, compositor, musico, pintor y un experto riba tereno di Papiamento.

Hubert Booi a yega di eherce e funcion di director interino di Toeristenbureau y di Arubaanse Voorlichtingsdienst. Na aña 1963 el a wordo nombra director di Bureau Cultuur en Opvoeding y desde 1978 te cu dia cu el a bay cu pensioen el a fungi como director di Instituto di Cultura.

Den e posicionnan ey Hubert Booi a desaroya su mes como un promotor grandi di e bida cultural di nos isla. E tabata co-fundador di Arubaanse Kunstkring y miembro di Sociedad Bolivariana.

Banda di esey e tabata actua den teatro y a skirbi obranan teatral (Golgotha), poesia (E ultimo Caribe) y storia (E sombra den baranca). E ta un conocedor auto-didacto di idioma, e.o. e idioma Ruso y ta tambe un pintor auto-didacto.

Como poëta den idioma Papiamento, Hubert Booi a skirbi texto pa cantica pa Padu Lampe y e texto pa e Himno Nacional di Bonaire.

Su obra teatral religioso “Golgotha” a wordo publica na 1967 den Antilliaanse Cahiers; na aña 1969 el a publica “Muchila” cu ta contene hopi storia y poësia. E ta principalmente conoci pa su musicals “E Perla di Caribe (1955) y “Amor di Kibaima” (1969)

Ainda tin hopi obra cu no a wordo publica den Coleccion Ito Tromp na Biblioteca Nacional Arubano, bao di cual tin hopi poësia, cantica y dos traduccion: “Un sueño riba bispo di Pasco” (Christmas Carol) y un fragmento di Romeo y Julieta. (Romeo and Juliet).

Den su obranan tin dos tema central: e amor pa Papiamento cu semper tabatin su atencion y di cua idioma e tabata un gran promotor pa decenianan largo. Booi a duna hopi curso na esnan cu kier a siña Papiamento, el a tene lectura na radio y television riba idioma y cultura den e programa “Nos Tera” y tabata e.o. miembro di Comision Daantje y Maduro.

Escritornan manera Henry Habibe y Cola Debrot (qepd) a duna comentarionan sumamente positivo riba su obranan.

Pa e motibonan aki miembronan di hurado a dicidi di propone Hubert Booi pa e premio literario cu ta wordo otorga cada dos aña “Cadushi di Cristal”. Hubert Booi ta un persona cu a destaca enormemente riba tereno di Papiamento.

Nos ta felicita Sr. Hubert Booi y e Pueblo di Aruba cu tin entre nan un talento asina grandi.